

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE DA XUNTA DE GALICIA E O CONCELLO DE LUGO PARA A POSTA A DISPOSICIÓN DOS TERREOS NECESARIOS PARA A EXECUCIÓN DAS OBRAS DE POSTA EN VALOR DOS RESTOS ARQUEOLÓXICOS DO CUBO VI DA MURALLA ROMANA DE LUGO.

Santiago de Compostela,

REUNIDOS

Dunha parte, D. Román Rodríguez González, actuando en representación da Consellería de Cultura, Educación e Universidade, en virtude do seu cargo de conselleiro, en exercicio das facultades que lle confire o artigo 34 da Lei 1/1983, de 22 de febreiro, reguladora da Xunta e da súa Presidencia, así como o artigo 2º da Resolución de 8 de abril de 1991, pola que se fai público o acordo do Consello da Xunta de Galicia de 27 de marzo de 1991 sobre convenios de cooperación con outros entes públicos e de colaboración con particulares.

Doutra, D^a. Lara Méndez López, actuando en representación do concello de Lugo, en virtude da súa condición de alcaldesa da citada corporación segundo o disposto no artigo 124 da Lei 7/1985, do 2 de abril, reguladora das bases do réxime local e no artigo 24 do Real Decreto legislativo 781/1986, do 18 de abril, texto refundido das disposicións legais vixentes en materia de réxime local.

Todas as partes teñen plena capacidade para levar adiante o presente convenio de cooperación e por tanto,

EXPOÑEN

Primeiro:

Que a Xunta de Galicia asume a xestión das funcións sobre o patrimonio cultural en virtude do Real decreto 2434/1982, do 24 de xullo, sobre traspaso de funcións do Estado á Comunidade Autónoma de Galicia en materia de cultura, de acordo co establecido no artigo 27.18 do Estatuto



de Autonomía, en consonancia co estipulado no artigo 148.1.16 da Constitución Española, ámbito desenvolvido na Lei 5/2016, do 4 de maio, do patrimonio cultural de Galicia.

Segundo:

Os apartados 1) e 2) do artigo 198 da Lei 5/1997, do 22 de xullo, de administración local de Galicia establecen que as administracións públicas galegas axustarán as súas relacións aos principios de colaboración, cooperación, auxilio, coordinación e respecto aos correspondentes ámbitos competenciais, garantíndose a máxima eficacia nas xestións administrativas, podendo subscribir convenios de cooperación entre si, segundo o disposto no artigo 198 da mesma lei. Do mesmo xeito, o artigo 3.2 da Lei 5/2016, do 4 de maio, do patrimonio cultural de Galicia, encomenda aos concellos a obriga de protexer, difundir e fomentar o valor cultural dos bens do patrimonio cultural de Galicia que se localicen no seu ámbito territorial.

Terceiro:

A Muralla de Lugo é un ben que ten a consideración de Ben de Interese Cultural e está incluído na lista do Patrimonio Mundial. Ademais, a muralla romana está incluído na delimitación do conxunto histórico de Lugo, ben inmovible que tamén está declarado Ben de Interese Cultural e parcialmente na delimitación como territorio histórico do Camiño do Norte a Santiago de Compostela, na súa ruta denominada Camiño Primitivo ou de Oviedo, ben que tamén conta coa consideración de BIC e que tamén está incluído na lista do Patrimonio Mundial. Polo tanto, a Muralla de Lugo, é un ben inmovible integrante do patrimonio cultural de Galicia e sometido ao réxime xurídico de protección que para estes bens establece a Lei 5/2016 do patrimonio cultural de Galicia.

A Muralla de Lugo é un ben inmovible propiedade da Xunta de Galicia, adscrito á Consellería de Cultura, Educación e Universidade xestionado pola Dirección Xeral do Patrimonio Cultural. Está destinado ao uso público, como un itinerario ou vía peonil que utilizan os veciños e visitantes da cidade de Lugo, que poden percorrer o seu adarve utilizándoo como un paseo público. Ademais as súas portas son atravesadas por distintas rúas de acceso ao recinto intramuros do conxunto histórico da cidade de Lugo.

Cuarto:

Durante a execución dos traballos de arqueoloxía realizados no marco da obra de Restauración e posta en valor do Cubo VI apareceron uns restos identificados como estruturas edificatorias e galería, polo que se determinou que era convinte non tapar os restos achados logo de documentalos e solicitouse ao Concello de Lugo (por ser o titular dos terreos nos que se atoparon



as estruturas edificatorias) a súa conformidade para deixalos á vista. O concello prestou a súa conformidade coas cautelas recollidas nos informes dos seus servizos técnicos.

As cautelas eran relativas ás posibles conexións das instalacións da intervención ás redes municipais de electricidade ou saneamento e se tiveron en conta no momento de redactar a proposta para consolidar os restos e habilitar unha baixada de acceso restrinxido á cota da piscina. Na proposta redactada non se prevé realizar conexións ás anteditas redes municipais.

Para realizar a actuación de posta en valor deses restos é preciso realizar un convenio co Concello de Lugo para a posta a disposición dos terreos no que se sitúan os restos fóra da aliñación da muralla.

Por todo o exposto, as partes acordan subscribir un convenio de colaboración baseado nas seguintes

CLÁUSULAS

Primeira.- Obxecto do Convenio

O obxecto do presente convenio de colaboración é regular as bases de colaboración entre a Xunta de Galicia, a través da súa Consellería de Cultura, Educación e Universidade, e o concello de Lugo para a **posta a disposición dos terreos necesarios para a execución das obras de posta en valor dos restos arqueolóxicos do cubo VI da Muralla Romana de Lugo.**

Para o desenvolvemento deste proxecto non é posible promover a concorrència pública, xa que as obras de intervención previstas para o cubo VI da Muralla Romana de Lugo, que van supoñer a posta en valor de restos arqueolóxicos de singular valor e sobranceiro valor e interese cultural integrante do patrimonio cultural galego, están incluídas no *Plan estratéxico para a protección e conservación do patrimonio cultural de Galicia* da Dirección Xeral do Patrimonio Cultural, dentro da medida *Conservación da Arquitectura Defensiva, tendo carácter prioritario, os traballos de conservación, restauración, mantemento dos inmobles da arquitectura defensiva que son propiedade da Xunta de Galicia como a Muralla Romana de Lugo, as torres defensivas da Limia, o recinto fortificado de Monterrei e o Castelo de Pambre*”.

Segunda.- Obrigas da Consellería de Cultura, Educación e Universidade

A Consellería de Cultura, Educación e Universidade da Xunta de Galicia, dentro das liñas de actuación que en materia de protección, conservación e posta en valor do patrimonio cultural,



están sinaladas no seu programa de obxectivos, realizará as actuacións oportunas para a execución das obras de posta en valor dos restos arqueolóxicos do cubo VI da Muralla Romana de Lugo, con cargo aos orzamentos xerais da Comunidade Autónoma de Galicia en función das súas dispoñibilidades económicas e en consonancia co disposto nos artigos 1 e 3 do Decreto 246/1992 da Consellería de Economía e Facenda (DOG núm. 159 do 17 de agosto de 1992).

Terceira.- Obrigas do Concello de Lugo

Pola súa banda, o concello de Lugo, comprométense a autorizar a plena e libre dispoñibilidade dos terreos necesarios a favor da Consellería de Cultura, Educación e Universidade para que esta poida acometer a execución das actuacións obxecto do presente convenio. Esta libre dispoñibilidade será realizada, segundo o establecido no Decreto 246/1992, do 30 de xullo, da Consellería de Economía e Facenda. Así mesmo, será o responsable de aprobar o documento técnico das actuacións e conservar e xestionar o acceso aos restos no ámbito dos terreos da súa titularidade.

Cuarta.- Comisión Paritaria

Coa finalidade de asegurar o cumprimento do presente convenio, créase unha comisión mixta de seguimento e control, integrada por:

1. Dous (2) representantes da Xunta de Galicia
2. Dous (2) representante do concello de Lugo

Quinta.- Resolución

O presente convenio resolverase polo incumprimento total ou parcial dalgunha das cláusulas que o regulan.

Sexta.- Vixencia

O presente convenio entrará en vigor o día da súa sinatura e estará vixente ata a finalización das obras obxecto do mesmo, prevista para o 31 de xullo de 2022 e, en todo caso, ata a finalización da intervención.

En todo caso, a duración máxima prevista non poderá ser superior aos catro anos, salvo que normativamente esté previsto un prazo superior, de acordo co artigo 49 apartado h) da Lei 40/2015, do 1 de outubro, de Réxime Xurídico do Sector Público.

Sétima: Publicidade do convenio

As partes asinantes deberán cumprir coas obrigas derivadas da entrada en vigor da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do



convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Asemade procederáse á inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Oitava: Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Novena.- Réxime Xurídico

Este convenio ten natureza administrativa. As cuestións litixiosas xurdidas da aplicación do presente convenio, e non resoltas en vía administrativa, serán resoltas pola xurisdición contencioso-administrativa.

E en proba de conformidade cos termos do presente convenio, as partes comparecentes asínano e rubricano por duplicado exemplar no lugar e data expresados.

O conselleiro de Cultura, Educación e
Universidade,

A alcaldesa do Concello de Lugo

Román Rodríguez González

Lara Méndez López

